

四庫全書

史部

欽定四庫全書

史部

文獻通考卷二百

九十一

詳校官內閣學士_臣瑞保

編修_臣程嘉謨覆勘

覆校官中書_臣孫希旦

校對官中書_臣金光悌

謄錄監生_臣馮堪

欽定四庫全書

文獻通考卷二百九十

鄱陽馬端臨貴與著

象緯考十三

月五星凌犯

神宗治平四年正月庚申月入東井主風雨又犯軒轅
大星主歲饑母后親屬咎罰五月甲申月犯左執法主
執法官憂八月熒惑犯軒轅大星主女主災十二月熒

惑犯亢主民疫 熙寧元年正月庚辰填退犯上相主
大臣有咎八月甲寅熒惑犯天江第二星主水壞城邑
民饑十月丙戌歲入氐主后有喜亦主赦 二年正月
戊寅月入東井主風雨七月辛巳太白犯輿鬼東南星
主兵十一月丙子填犯亢距星主逆臣有謀五穀傷民
流亡 三年二月辛卯熒惑入天籥主防姦盜或火五
月癸巳熒惑退犯天江主旱九月月掩天關主有亂臣
更天子法令或典司關津者有罪十月戊午熒惑犯壘

辟陣西北星主兵 四年正月乙未月犯天關主有亂
臣更法令亦主掌關津者有罪四月犯天江主津梁不
通八月甲子犯壘辟陣西第一星主軍兵憂十一月丁
亥辰犯罰南一星宜察獄 五年正月乙丑熒惑犯天
江東第一星主大旱或大水六月己酉太白犯畢距星
主兵起將有咎七月癸巳月犯羽林軍西第一星主兵
出十一月戊午熒惑犯外屏西第二星主民不安 六
年正月甲子月犯東咸西南第二星主陰謀及民饑六

月癸未太白犯東上相主相有咎亦主兵喪七月丙寅
太白犯南斗距星主國有兵事亦主外國有使來十月
辛巳月犯外屏西第五星主人民不安 七年正月丁
未填犯天江東北第一星主江河決溢土功興六月月
犯天江北星主邊遠道路阻塞十一月熒惑犯左執法
又入太微垣主大臣有憂 八年正月癸卯月犯司怪
北第一星主有怪異事閏四月甲戌太白犯輿鬼西北
星主大將憂民多疫七月庚午月犯狗國西南星主三

韓鮮卑烏丸獫狁之屬有咎十月戊戌月犯外屏西第三星主民憂 九年正月辛未月犯長垣第一星主胡夷兵動六月辛卯歲入東井有軍在外亦有川瀆之事七月丁丑歲犯天鐸西星主貧餒闕食十月庚子月犯五諸侯西第四星主將相憂十一月乙亥月犯箕東北星主暴風雨 十年四月丙戌熒惑犯輿鬼東北星主魚鹽貴九月己酉太白入太微垣主廷尉丞相御史有黜者十二月辛卯月掩輿鬼西北星主將有咎或大臣

黜 元豐元年四月庚申月入南斗主大臣辱女主災
七月戊戌熒惑犯天鐫西北星主秦分民饑十二月壬
戌太白犯建西第二星主大臣互譖毀外國有使至
二年二月壬戌熒惑入犯輿鬼東北星主兵馬出四月
己卯月犯日星下主下不順宜以赦宥應之七月癸未
月犯雲雨東北星主多雨十二月庚戌犯軒轅太民主
大臣黜 三年六月癸巳太白犯畢距第二星主邊兵
敗七月丁卯熒惑入東井主無兵兵起有兵兵罷十二

月癸未月犯建西第三星主大臣相譖 四年三月壬辰月入東井主貴臣死七月庚戌熒惑入氐主有賊臣宜宮中慎火十月壬戌月犯雲雨西北星主多雨水

五年二月辛酉月犯水位第一星主水流溢七月乙巳熒惑入輿鬼主金玉用有大赦秦分沒軍殺將十月丁巳月入犯雲雨西南星主雨澤成萬物 六年三月己

亥熒惑犯東上相主大臣有咎六月戊戌熒惑入犯氐東南星主慎火八月癸未熒惑犯天江南第二星主旱

十二月庚辰月掩犯畢距第二星主邊兵動女主憂

七年三月壬寅月犯畢距星主多雨四月丁亥歲犯羅
堰主糧貴十月甲午月犯心大星主王者憂 八年二
月乙酉熒惑犯東咸主人民有疾疫旱災六月丙子月
犯建第四星主大臣相譖八月甲戌太白犯軒轅軒轅
者黃帝之神黃龍之體后妃之所主職今太白行犯以
所主占之十一月癸卯月犯畢大星主大臣死又主有
邊兵若七日有風雨即解之

哲宗元祐元年二月甲戌月犯左執法主大臣有憂又
主大臣有免者四月辛丑月犯罰主掌罰者憂八月月
犯畢大星主多雨十月丙午月入太微垣犯右執法主
大臣有憂將相有免者二年三月月犯建主有兵又
主大臣相譖五月戊辰月犯羅堰星主水溢十一月甲
戌月犯罰主罰贖平三年七月甲子歲犯天鐫主給
濟貧乏十二月甲寅熒惑犯天籙主掌管籙官有咎宜
察關鍵四年三月丁亥月犯天江主河津不通四月

犯氐主兵起將臣有憂七月乙亥犯罰星主罰贖平九月辛卯月入太微垣軌道吉 五年正月辛巳月入太微垣犯內屏主輔臣有免者四月庚寅月掩畢為女主有憂當以赦令除咎十月庚子月犯羽林軍主大臣有憂亦主兵將黜 六年三月庚辰填星犯東井主水旱不時四月己亥填星入太微行軌道吉 七年三月戊戌月入氐主政令行臣下忠孝四月癸亥月犯進賢宜舉俊賢搜遺逸七月辛未月犯司怪主怪異事十二月

壬戌太白犯雲雨主有雨澤萬物成 八年正月丙申
月犯進賢主進賢之官有憂六月己酉太白犯諸王東
第二星主宗臣憂七月甲申月犯心距星主大臣憂十
月月犯外屏主民人憂 紹聖元年二月月犯斗主風
雨不時四月丙午月犯五諸侯第二星主大臣憂八月
丙子月犯箕東北星主多風及糴貴十一月丙午太白
犯咸西南第一星主兵 二年正月甲寅月犯角距星
主大臣誅有獄事五月己酉犯箕東北星主多風又主

后憂災八月犯外屏西第一星主民不安十一月犯輿
鬼東北星主民多疾 三年二月庚辰太白入昴主大
赦七月癸巳太白入東井將軍惡之先起兵者敗又主
有大水十一月壬戌月犯鉤星主多盜 四年二月己
亥月犯天門東星陰陽不調四月庚子犯西星主盜賊
劫掠人民七月丁巳熒惑掩犯積薪主大旱兵起十月
癸巳填犯進賢主賢者得罪黜免 元符元年正月丙
辰填犯進賢占同上六月乙未月犯雲雨主多雨澤七

月乙丑熒惑犯氐宜警臣下及修火禁十月甲午辰入
氐主貴臣暴憂法官有獄事 二年正月壬戌犯天門

東星主陰陽不順四月丁丑月犯井東扇灶第三星主
水官有黜刑政不平又主風雨七月壬子犯建西第三
星主大臣相譖十月己未熒惑犯進賢主賢臣退黜

三年正月辛未熒惑犯氐東南星主君憂又主將相有
憂四月壬寅熒惑退行犯亢南第一星主亂兵疾疫九
月太白犯南斗西第二星主小人在位兵革欲興十二

月丙辰月入氐主天下兵起

徽宗建中靖國元年二月癸卯月犯軒轅右角太民主
大饑人流女主有憂四月乙巳月犯罰星主法令曲八
月丁酉月犯建第二星主大臣相譖十月甲辰熒惑犯
平道西第一星主隱士升又主天下大亂 崇寧元年
正月己巳月犯水位西第四星主水溢流閏六月庚辰
太白犯進賢主賢者黜十月乙丑月入畢口主君臣憂
兵 二年二月壬戌熒惑犯昴主胡人聚中國匈奴兵

起五月己亥月犯雲雨東北主雨不時八月丙子太白
入氐主糴貴十月甲子熒惑犯亢南第一星主有亂臣
三年三月癸亥太白犯昴距星主胡王死又主臣有
謀易政令四月壬子熒惑犯壘壁陣西第五星主兵大
起七月戊戌太白犯積薪主大旱民流十一月己丑月
入太微垣主有姦人在主側 四年三月壬寅熒惑犯
井鉞主斧鉞用七月庚辰太白犯罰主賞罰失平十二
月填犯建第二星主臣下相譖 五年正月戊申月入

太微垣主四夷兵盛五月辛丑月入氐主兵動八月丁卯熒惑犯天街南主邊兵動十月乙丑熒惑犯昴東南星主饑疫 大觀元年正月丁未太白犯外屏主障蔽四月戊午太白入井主政急民流五月甲午月犯進賢主蔽賢九月己丑月犯天籥主關籥不禁十二月丁未月犯建主大臣相譖 二年二月癸巳月入太微垣犯內屏主姦人在國四月癸巳月犯壘壁陣主用兵七月癸酉熒惑犯司怪主水旱不時九月壬申月入太微垣

主四夷兵盛 三年二月己丑月入太微垣犯內屏主
上下失禮輔臣免五月辛亥太白犯天狗主陰謀十二
月丙申歲犯外屏主障蔽 四年正月戊申月犯天街
主邊兵動六月乙亥月犯進賢主賢人退閏八月丙午
填犯泣主喪十月庚寅太白犯江主水 政和元年二
月乙卯月犯南斗主大臣后妃憂六月己酉月入羽林
軍主兵起七月壬申月犯狗主守禦不嚴 二年六月
辛亥熒惑入井主先舉兵者將死九月丁卯歲犯鬼主

君憂民饑 三年正月乙亥熒惑犯太微垣內屏主上

下失禮輔臣免六月戊午太白入太微垣犯右執法凶

九月庚寅熒惑犯天江主旱十月乙丑月犯鬼主秦分

有兵 四年十一月庚寅熒惑犯進賢主賢人得罪貶

死 五年正月乙亥熒惑犯亢主有亂臣疾疫六月壬

子月犯狗主守禦臣憂九月甲申月犯昴主匈奴憂十

月丙辰月入鬼主君臣憂 六年閏正月歲犯亢主佞

臣用六月辛未月犯心大星主人主憂七月辛亥歲犯

亢主臣為亂十二月癸亥八氏主賊臣在內 七年正月丁酉熒惑犯鍵閉宜戒行幸七月乙未熒惑犯天江主旱十月丙辰填星犯畢主兵起西北而不戰 八年正月丁亥熒惑犯外屏主蔽障六月己巳月犯雲雨主雨澤九月癸亥熒惑犯進賢主賢者得罪十月戊申熒惑入氐主宮中火災 宣和元年九月熒惑犯壘壁陣主兵作十一月己未月犯鬼主將軍死大臣黜國有憂 二年正月己酉月犯畢主天下有變令十月庚辰熒惑

犯亢主有亂臣民多疾 三年正月戊申熒惑犯南斗
主破軍殺將暴兵起十一月丙戌月犯罰主刑罰用
四年三月甲戌歲犯昂主北征胡 五年正月壬戌月
犯畢主天下有變令五月甲寅太白犯鬼主有兵謀九
月己未熒惑犯司怪主水旱不時十一月太白犯房主
人君將相憂 六年正月己巳月入氐主兵大作十月
丁巳月犯畢主天下有變令刑急臣叛 七年五月壬
辰太白犯畢主邊兵起民饑六月丁巳月入羽林軍主

兵興十二月丙辰月入太微垣主君弱臣強四夷兵盛
欽宗靖康元年三月庚戌月入太微垣主君弱臣強四
夷兵盛五月壬申太白入鬼犯積尸氣主亂臣在內兵
起大臣將軍誅七月己卯月入羽林軍主兵起十月丙
辰月入太微垣主四夷兵盛十一月庚午太白犯亢主
君自將兵 二年二月丁卯月入太微垣主大國破亡
月犯五緯

神宗治平四年正月辛亥月犯辰主上卿憂八月辛未

犯太白主將二心癸酉掩歲主邊兵九月壬寅犯太白
主鄭楚分兵十月戊辰掩填星主楚分流民又犯熒惑
主荆楚兵 熙寧元年二月丁巳犯填主宮女出楚分
流民四月壬子犯歲主楚分兵或饑 五年四月癸亥

犯填占同閏七月庚申犯熒惑主察讒臣或貴人有咎

六年九月甲辰掩太白金主燕分兵 十年九月庚午

犯歲主周分饑十二月壬辰犯歲占同仍有邊兵 元

豐七年十月甲午犯辰主兵校尉有憂 八年八月戊

寅犯填主後宮有出者十一月戊戌犯歲主衛分饑民
流亦為邊兵庚子犯填主後宮有憂及民流土功興

哲宗元祐三年七月庚午犯太白金主秦分兵十月壬辰
犯歲 四年三月丙子又犯皆主秦分兵饑七月辛卯
犯填十月癸丑掩之皆主後宮有出者 六年九月癸

卯犯熒惑主有兵十二月甲戌掩歲主鄭分饑邊兵動

八年十二月丁巳犯熒惑主有兵戰小吏憂 紹聖

元年六月甲戌犯太白金主秦分兵九月辛酉犯填十二

月癸未又犯皆主後宮宜崇福及主民流 二年正月
庚戌又犯主周分下陵上及後宮憂四月壬申又犯主
民流 三年九月戊戌犯歲主齊分饑有邊兵 四年
七月丁丑犯熒惑主兵戰小吏憂 元符二年八月壬
辰犯歲十一月辛巳十二月戊申又犯皆主晉分民流
饑 三年六月癸卯犯熒惑主小吏死貴人出大將亡
徽宗建中靖國元年五月辛未犯填主下犯上后災民
流亡 崇寧元年七月丁亥犯太白金主強倖作難國戰

不勝民靡散 五年二月戊子犯熒惑主兵起大將死

貴人出 大觀二年十二月戊子犯熒惑占同 四年

七月戊午犯歲主邊兵動民饑流亡 政和元年正月

己巳犯歲占同 宣和元年正月乙卯犯填主下犯上

人民流 三年八月戊申犯熒惑主兵起小吏死大將

亡貴人出 四年八月庚戌犯填主下犯上後宮災民

流亡 七年十一月乙酉犯熒惑主貴人出兵起將亡

高宗建炎三年三月乙未月入氐占曰兵動是夜土犯

亢占曰臣有謀是月苗傳劉正彥作亂至秋伏誅五月丙午歲星逆行犯房占將相有憂於是呂頤浩相杜充降敵七月辛巳太白入太微垣占邪臣伏誅次年張浚奏誅范瓊癸巳歲星犯鈎鈴占曰王者失政近臣起亂是冬上將謀航海避敵禁兵謀作亂伏兵誅之八月癸丑熒惑入鬼犯積尸占賊在君側又軍死將亡於是敵大入浙西殺人如麻閏八月丙戌太白犯心占兵興殲在貴人又主王者惡之次逼明堂纔一舍上甚懼壬寅

稍北歸黃道甲子熒惑犯太微垣占上將為天子所誅
丙寅熒惑入太微垣占天下不安草澤天文耿靜言熒
惑行當在己今超過午入太微於法為凶十一月乙巳
熒惑出太微垣東左掖門己酉犯垣東上相徘徊不去
是歲敵大入江浙湖南上航海幸溫台來春始還越

四年正月癸亥太白犯建星占大臣相譖八月辛卯犯
五諸侯占將相憂九月趙鼎罷 紹興元年正月乙亥
朔熒惑入羽林占有叛臣起是春李成叛二月癸卯月

犯五諸侯西第五星占將相憂四月癸酉月犯權星占
主有逆賊火災冬越州火辛巳月犯心占大臣有憂未
幾范宗尹罷相八月辛未月復犯心未幾張浚罷秦檜
相癸酉月犯昴占敵主死期不出五年應在四年烏奇
邁殂九月乙巳月入羽林占兵起己巳月犯太白占強
國以戰敗十月吳玠大敗烏珠於和尚原十月丁丑熒
惑犯執法占大臣憂庚辰順行出太微垣東北掖門十
一月辛丑熒惑犯進賢占賢者得罪免黜先是婁寅以

言宗社大計擢監察御史秦檜惡之諷言者論而黜之
二年正月丙申熒惑入氐占天子失其宮是月上移
蹕臨安二月辛未月犯五諸侯第四星占將相有憂於
是呂頤浩與秦檜不協檜罷相五月乙亥熒惑犯氐東
南星占將相有憂又有火災未幾臨安火七月甲戌熒
惑犯天江占曰大旱次年旱 三年七月癸亥月入南
斗行魁中占大臣憂其後呂頤浩罷十一月丁巳月犯
壘壁陣西第六星占兵起是月偽齊引兵寇淮烏珠聚

兵寇蜀吳玠擊却之辛未熒惑犯氐占多火災於是臨
安四月火災十二月辛未月犯昴占敵主死應在次年
丙申月犯鬼占秦分有兵次年春烏珠犯大散關吳玠
破之辛丑熒惑犯房北第一星占將相憂又曰馬貴於
是吳玠始通西馬 四年二月壬戌月犯東諸侯第一
星占將相憂其秋朱勝非罷五月辛亥熒惑犯輿鬼占
有兵謀斧鉞用十月丙子熒惑犯壘壁陣西北戌戌又
犯第六星占兵大起是日上親征發臨安以殿前司及

神武中軍從十二月丙戌月犯昴西北星占敵主死天子破匈奴不出三年於是金主烏奇邁殂亶代立五年二月庚戌填犯建星太白四月壬子歲星犯井鉞占斧鉞用十一月己丑太白犯壘辟陣占兵起甲午月入井占如之於是大舉伐劉豫十二月己卯熒惑犯天江占旱次年旱六年五月辛卯太白犯畢上謂輔臣曰金星犯畢占邊有敗兵當諭張浚令諸帥戒飭守邊者雖自有分野亦不得不戒明年六月酈瓊殺呂祉以其

軍降劉豫六月己未月犯昴占敵主死明年尼堪死十
二月辛酉歲入鬼占大臣災相黜於是趙鼎罷 七年
正月癸亥月逆行入鬼犯積尸占王者憂國有兵喪三
月壬午亦然於是徽宗寧德訃至三月辛巳月犯牛宿
西第一星占臣將黜又曰大臣將兵於是冬張浚罷趙
鼎復相呂頤浩守建康四月甲午熒惑入井占兵旱是
秋旱五月丁丑月犯建星占大臣相譖時張浚與趙鼎
不協上疏毀之癸酉月犯牛南星占下有憂將軍死厥

應在九年吳玠薨十年岳飛被譖死也八月丙申月犯房北第二星占次相憂於是張浚以酈瓊叛罷相俄貶永州十二月戊午金人羽林軍占天子以軍自守其夜月犯房北第一星占將相憂於是始議講和九年正月辛卯月入東井其四月癸丑六月乙亥八月丙申十月甲子十二月己未皆復犯井占諸侯貴人死是歲呂頤浩吳玠李綱相繼薨二月己巳月入氐其四月癸亥六月戊午八月癸丑亦如之占兵動於是金人始歸河

南陝西俄復興兵取之四月癸亥月犯氐占天下兵起
六月戊午復入氐是歲金人既敗盟諸將各出師敗之
九月壬戌月犯天高占將死臣誅十二月丁巳復犯天
高次年趙鼎再貶岳飛下獄死 十年正月戊子木入
氐占有赦甲辰留其七月辛未復入氐占當有善令其
歲太平年豐立后有喜後二年立后吳氏三月辛卯月
入氐六月七月八月十二月皆入氐同占兵起是歲烏
珠再入寇諸將進取大捷 十一年十一月乙卯月入

太微垣占大臣有憂將相有免者若期三年有為天子
所誅於是岳飛下獄死韓世忠罷丙辰月犯進賢占賢
者得罪明年胡銓貶張戒勒停自此賢者多貶黜死亡
不可勝數 十二年月犯氐井畢入太微者相仍於是
張浚罷劉光世薨 十四年正月庚申月入畢掩大星
占陰國有憂是歲金人伐蒙不克乃冊之為帝 十七
年五月壬戌木順行入東井占天下有川瀆之事於是
浙西建康同日大水九月己卯金入太微垣占屬楚地

於是漳州盜起 十九年正月辛丑火犯亢占大人多

疾有不臣其年秦檜始以病告七月戊申火星犯南斗

占丞相有事次年施全刺秦檜不中而誅八月戊午月

入南斗十月辛未火順行犯壘壁陣次年信州建州皆

有盜起 二十年七月己卯月犯角宿距星占大人憂

有獄事是時連起大獄八月癸亥月犯畢宿距星占敵

主死 二十一年十一月戊申月犯昂星占敵主死將

軍死皆為完顏亮將亡之兆 二十二年正月丙辰月

犯心東星占大臣有憂是歲八月韓世忠薨 二十三年三月戊申月犯南斗是歲浙西水 二十四年六月丙午月犯羅堰是秋大水十月乙未月掩建星占大臣相譖 二十九年正月乙亥月犯氐距星占女后後宮災是秋顯仁太后崩二月癸卯入氐方口內占兵動是歲凡四於是金主亮遷汴謀叛盟七月辛亥火星入鬼宿犯積尸氣占兵喪旱災兵在西虜軍死將亡次年逆亮兵五十萬屯宿泗謀入寇 三十年正月戊戌月入

氏占兵動二月乙丑亦如之是歲凡五六月壬申金星
順行入東井占先起兵者敗將軍犯罪政急民流明年
金亮入寇 三十一年正月甲申月犯東井是歲凡七
二月入氏是歲凡三皆兵兆也七月壬辰金星順行犯
角距星占天下大戰道路不通 三十二年正月戊寅
歲星退行入太微垣占軌道吉又曰天下喜或有赦其
年五月乙未木順行入太微垣占同是年孝宗受禪庚
申月入井是歲凡八

孝宗隆興元年二月己巳月入東井是歲凡三癸卯月
入羽林軍為兵起是歲凡三 二年正月戊子月入羽
林軍是歲凡八其冬敵犯淮南辛亥熒惑犯房宿占將
軍亂國君將相憂於是張浚罷未幾洪适罷己巳月犯
長垣其閏十一月戊辰亦如之占長垣四星占主邊界
城墻以備敵兵於是金人使來欲割四郡卒與之 乾
道元年三月辛未月入羽林軍是年凡八 二年六月
乙酉月入斗八月庚辰亦如之占女后憂太子辱九月

庚戌月犯哭星主悲泣事十一月戊午月犯權星占曰
女后憂明年皇后夏氏崩太子愔薨三年四月壬申
月犯五諸侯占將相憂是年吳璘薨癸丑月掩南斗占
大臣太子辱風雨不時丁丑月犯房占為將相憂庚辰
月復入南斗魁是歲兩浙水旱其冬葉顥魏杞罷相

四年二月丁巳月入羽林軍是歲凡十六年二月丁

未月入羽林占為兵起是歲凡三九年六月癸亥火

星犯太微垣西扇右執法星占大臣有憂十月庚午木

犯太微垣右執法占將相執法臣憂十二月亦如之明年虞允文以帥蜀薨於興元 淳熙二年七月戊子月犯房宿占將相執法憂次年葉衡貶 四年七月辛酉火犯氐宿占將相憂明年龔茂良罷貶 五年正月壬戌土星留守諸王星明年魏王愷薨 六年十一月己未月犯木占齊分歲荒民流亡明年江浙淮西湖北旱除民賦賑恤之 八年正月己未月入東井是歲凡六閏三月丁未月入太微垣是歲凡六 十三年七月甲

申月掩心宿八月己卯月掩大星 十四年三月戊午
月行犯心宿距星占大臣有憂是冬梁克家薨四月辛
卯月入羽林軍是歲凡三五月月犯心宿大星又犯中
央星占人主有憂是年冬高宗上仙六月庚寅月行入
斗宿內占大臣太子憂是冬太子參決辭不許十月壬
辰火星留守五諸侯占諸侯貴人死次年恩平郡王璩
薨 十五年正月壬子木星行犯房宿北第一星占將
相憂二月己巳木星留守房宿占有赦天下和平次年

光宗受禪大赦六月己丑太陰犯昴占敵主死明年正月金主雍殂十六年正月辛丑土星留守氐宿方口內占守氐有德令土功興又云皇后太子喜歲安於是二月立后

光宗紹熙元年五月己未太陰行在斗宿距星西北占風雨不時臣將黜死女后憂二年八月庚寅火星入鬼宿犯積尸占在西北軍將死亡三年正月己酉火星入太微垣內留守占太微垣在翼軫之宿北天子之

庭五帝之座十二諸侯之府今熒惑入中留天子惡之
是時上有疾久不視朝四月丁巳火星犯太微垣右執
法星占有逆賊宮中不安八月甲辰金星行犯權星左
角少民星占女后宗族災又云大臣當之 四年十月
丁酉火星入太微垣內徘徊內屏者凡四閱月占宮中
不安歲饑又曰有喪次年六月孝宗上仙十一月己巳
火星犯上相星占上相有罪次年留正黜 五年八月
壬辰火星犯房宿占將相憂於是羅點卒次年趙汝愚

貶死十一月庚戌木犯諸王星占諸侯宗臣災

寧宗慶元年六月丁卯金入東井占先起兵者敗將軍死政急民流九月丙戌火入太微垣占有逆賊二

年八月乙亥木犯權星次年慈福太皇太后崩三年

二月辛亥月入畢占陰國有憂天子用誅罰急臣叛將相災或邊兵入四年三月乙巳木星入太微垣犯右

執法六月乙丑土星犯壘壁陣星西方第五星占爲兵起十月戊午月行入太微垣內至次年凡四並同此爲

四裔姦人來聽伺之象 嘉泰元年五月丁丑火星細

行不行黃道為死色占為變色有喪是歲臨安大火三

日乃息 三年七月戊子木星行入羽林軍 四年三

月壬申月犯權星占有逆賊并火災六月戊申入羽林

軍七月丙子又入羽林軍時出師北伐 開禧元年正

月己卯火星留守五諸侯星從西第四星占諸侯兵死

是歲吳曦反於蜀俄伏誅三月己巳月入太微垣四月

戊申月入羽林軍 二年六月丙寅月入羽林軍內占

為兵起七月乙未木星犯井宿鉞星占為斧鉞用又為
亂兵起 三年二月癸丑月犯五車東南星占兵起駕
道不通己未火星退留守權星占女后有憂於是成肅
太皇太后崩九月乙亥木星順行入鬼宿在積尸氣鑽
星西南占大臣災又犯鑽星兵喪王者疾斧鉞用是冬
侂冑誅斬蘇師旦 嘉定元年二月丙午月犯昴占敵
主死次年金人戕其主允濟 二年二月乙酉火星退
行犯太微垣上相星三月己酉火星留守太微垣中占

為大臣有憂於是五月有羅日愿謀變六月甲申月行掩土星是為月蝕土星占月犯土星則其地下犯上又曰凡月蝕五星其分有災或亡地於是李元礪反於郴州連破數縣十月乙丑月食火星占月食火星其地亂

五年正月丁巳月入東井於是久雨 八年正月辛

未月入東井占水旱不時是夏大旱蝗 九年正月丙

寅月入東井於是兩浙江東有水災 十年七月乙酉

金星行犯角占天下大戰道路不通是冬金人寇四川

明年山東李全來歸 十一年八月己丑木星留守東井占為三軍大起於是金人犯隨棗陽 十二年四月壬申土退行入氐宿方口內占天下有兵期不出四年又曰將有亡地者於是金人陷興元六月庚辰金星順行入井占大水先起兵者敗將軍犯罪政急民流是歲莫簡反於蜀 十三年二月庚寅木星順行犯鬼占民饑人君憂是歲秋景獻太子薨 十六年正月戊申木星留守氐宿距星占歲豐后有喜甲寅降生皇子

雜星變

秦末項羽救鉅鹿枉矢西流枉矢所觸天下之所伐射
滅亡象也物莫直於矢今蛇行不能直而枉者執矢者
亦不正以象項羽執政亂也羽遂合從阮秦人屠咸陽
凡枉矢之流以亂伐亂也

漢孝文後二年正月壬寅天欖夕出西南

歲星之精

占曰為

兵喪其六年十一月匈奴入上郡雲中漢起三軍以衛
京師八月天狗下梁楚

孝景三年七月天狗下占為破軍殺將狗又守禦類也
天狗所降以戒守禦其年吳楚反攻梁梁堅城守遂伏
尸流血其下 中三年六月壬戌蓬星見西南在房南
去房可二丈大如二斗器色白癸亥在心東北可長丈
所甲子在尾北可六丈丁卯在箕北近漢稍小且去時
大如桃壬申去凡十日占曰蓬星出必有亂臣房心間
天子宮也是時梁王欲為漢嗣使人殺漢爭臣袁盎漢
按誅梁大臣斧鉞用梁王恐懼布車入關伏斧鉞謝罪

然後得免

孝昭始元中蓬星出西方天市東門行過河鼓入營室
中梁成恢曰蓬星出六十日不出三年下有亂臣戮死
於市

詳見五
星凌犯

元鳳五年四月燭星見奎婁間占曰有

土功胡人死邊城和其六年正月築遼東元菟城二月
度遼將軍范明友擊烏桓還

莽地皇四年王尋王邑圍昆陽有營頭星墮軍上

詳見

雲氣
門

漢靈帝熹平二年四月有星出文昌入紫微宮蛟行有
首尾無身赤色有光焰垣牆占曰文昌為上將貴相後
六年司徒劉羣為中常侍曹節所譖下獄死 光和中
國皇星東南角去地一二丈如炬火狀十餘日不見占
曰國皇星為內亂外內有兵喪其後黃巾賊張角燒州
郡朝廷遣將討平斬首萬餘級中平六年宮車晏駕大
將軍何進令司隸校尉袁紹私募兵千餘人陰踣雒陽
城外竊呼并州牧董卓使將兵至京都共誅中官對戰

南北宮闕下死者數千人燔燒宮室遷都西京及司徒王允與將軍呂布誅卓卓部曲將郭汜李傕旋兵攻長安公卿百官吏民戰死者且萬人天下之亂皆自內發晉惠帝永熙元年三月妖星見南方占曰妖星出天下大兵將起是月賈后殺太子趙王倫尋廢后殺張裴又廢帝自立於是三王並起迭搃大權元康四年九月甲午枉矢東北行竟天六年六月景午夜有枉矢自斗魁東南行按占曰以亂伐亂北斗主執殺出斗魁居

中執殺者不直之象也是後趙王殺張裴廢賈后因自篡盜以至屠滅以亂伐亂之應也一曰氏帥齊萬年反之應也 光熙元年五月枉矢西南流時司馬越西破河間兵奉迎大駕尋收繆允何綏等肆無君之心天下惡之及死而石勒焚其屍柩是其應也

元帝太興三年四月壬辰枉矢出虛危沒翼軫占曰枉矢所觸天下之所伐翼軫荊州之分野太寧二年王敦殺譙王承及甘卓而敦又梟夷是其應也

穆帝升平二年十二月枉矢自東南南流於西北其長半天
四年十月庚戌天狗見西南占曰有大兵流血
孝武太元二十年九月有蓬星如粉絮東行南歷女虛
至哭星占曰蓬星見不出三年必有亂臣戮死於市時
王國寶交構朝廷二十一年帝崩安帝隆安四年王恭
等興兵朝廷殺國寶

梁武帝普通元年九月乙亥有星晨見東方光爛如火
占曰國皇見有內難有急兵反叛其三年義州刺史文

僧朗以州叛

陳後主至德元年正月壬戌蓬星見占曰必有亡國亂臣後帝於太皇寺捨身作奴以祈冥福不恤國政用施文慶等以至亡國

隋文帝仁壽四年六月庚午有星入於月中占曰有大喪有大兵亡國破軍殺將七月帝崩

煬帝大業十二年九月戊午有枉矢出北斗魁委曲蛇形注於南斗占曰主以兵去天之所伐亦曰以亂伐亂

後二年字文化及弑帝僭號

唐武后光宅元年九月二十九有星如半月見西方

肅宗上元元年閏四月二十一日妖星見於西方長數丈至五月滅

昭宗乾寧元年七月妖星見非彗非孛不知其名時人謂之妖星或曰惡星 天復元年五月有三赤星各有鋒芒在南方既而西方北方東方亦如之頃之又各增一星凡一十六星少時先從北滅占曰濛星也見則諸

侯兵相攻已巳夕有星當箕下如炬火炎炎上衝人初以爲燒火也高丈餘乃隕占曰機星也主天下有亂

天祐元年四月有星狀如人首赤身黑在北斗下紫微中占曰天衝也天衝抱極泣帝前血濁霧下天下冤後三日而黑風晦暝二年四月庚子夕西北隅有星類太上有光似彗長三四丈色如赭辛丑夕色如鵠或曰五車之水星也一曰昭明星也三年十二月昏東方有星如太白自地徐上行極緩至中天如上弦月乃

曲行頃分之為二占曰有大孽

後唐明宗天成元年三月惡星入天庫流星犯天棓

宋高宗紹興三十一年六月己巳北斗天權星東北有一小星出光似彗太史指以為含譽非也

孝宗淳熙十四年五月有星出濁際大與日等入時與日相摩蕩高宗在德壽宮登臺見之召能天文者修武郎王道問之道跪奏曰是謂蓬星見則有兵然分非南朝金人應之耳出語所親曰非兵也喪爾某不敢言是

冬高宗不豫遂上仙於是金人亦有大喪敵亦應天道云

按雜星變者出於五緯彗孛客星之外前史間載之至宋天文志則失於紀錄而所書流星最多往往錯見於流星條下矣獨中興志有此二則故載之於此而餘則見流星門云

文獻通考卷二百九十

欽定四庫全書

文獻通考卷二百九十一

鄱陽馬端臨貴與著

象緯考十四

流星星隕

春秋魯莊公七年夏四月辛卯夜恒星不見

恒常也謂常見之星

辛卯四月五日月光尚微蓋時無雲日光不以昏沒夜明也夜中星隕如雨如

也夜半乃有雲星落而且雨其數多皆記異也與雨偕

日光不匿恒星不見而云夜中者以水漏知之

也也偕俱公羊傳恒星者何列星也列星不見則何以知

夜之中星反也反者星復其位如雨者何非雨也非雨則曷為

謂之如雨不修春秋曰雨星不及地尺而復不脩春秋謂史記也

古者謂史記為春秋君子脩之曰星實如雨明其狀似雨耳不當言雨星不言尺者實

則為異不以尺寸錄之何以書記異也穀梁傳恒星者經星也經常

也謂常列宿日入至於星出謂之昔不見者可以見也夜中

星隕如雨如而也星既隕而復雨隕云敏反復扶又反其隕也如雨是夜中

與星既隕而雨必晦暝安知夜中乎與音餘暝亡定反春秋著以傳著疑以傳疑

明實錄也

傳直專反中之幾也而曰夜中著焉耳

幾微也星既隕而雨中微難知

而日夜中自以實著尔

非臆度而知度徒各反何用見其中也失變而錄其時

則夜中矣

失星變之始而錄其已隕之時檢錄漏刻以知夜中

其不曰恒星之隕

何也我知恒星之不見而不知其隕也我見其隕而接

於地者則是雨說也

言我見從上來接於下然後可以言雨星今唯見在下故曰隕星我

見之見音如字註同雨於付反註同

著於上見於下謂之雨著於下不見

於上謂之隕豈雨說哉

解經不得言雨星而言隕星也鄭君曰衆星列宿諸侯之象不

見者是諸侯棄天子禮儀法度也劉向曰隕者象諸侯隕墜失其所也又中夜而隕者象不終其性命中道而

落

僖公十六年春王正月戊申朔隕石于宋五

隕落也聞其隕視之

石數之五各隨其聞見先後而記之莊七年星隕如雨見星之隕而墜於四遠若山若水不見在地之驗此則見在地之驗而不見始隕之星史各據事而書之也隕星也

但言星則嫌星使石隕故重言隕星

秦始皇三十六年熒惑守心有墜星下東郡至地為石或刻其石曰始皇死而地分始皇聞之遣御史逐問莫服盡取石旁人誅之燔其石

漢惠帝三年隕石縣諸一

縣諸道也屬天水郡

孝武帝元光中天星盡搖上以問候星者對曰星搖者民勞也後伐四夷百姓勞於兵革

武帝征和四年二月丁酉隕石雍二天晏無雲聲聞四

百里

雍扶風縣晏天昏也

昭帝始元中流星下燕萬載宮極東去

李奇曰極屋梁也或曰極棟也三

輔間名棟為極尋棟東去也廷篤謂之堂前闌楯也

法曰國恐有誅

詳五星凌犯門

元

平元年二月甲申晨有大星如月有衆星隨而西行乙

酉祥雲如狗赤色長尾三枚夾漢西行大星如月大臣

之象衆星隨之衆皆隨從之象也天文以東行爲順西
行爲逆此大臣欲行權以安社稷占曰太白散爲天狗
爲卒起卒起見禍無時臣運柄祥雲爲亂君到其四月
昌邑王賀行淫辟立二十七日大將軍霍光乃白皇太
后廢賀三月丙戌流星出翼軫東北干太微入紫宮始
出小旦入大有光入有頃聲如雷三鳴止占曰流星入
紫宮天下大凶四月癸未宮車晏駕

元帝建昭元年正月戊辰隕石梁國六

成帝建始元年九月戊子有流星出文昌色白光燭地
長可四丈大一圍動搖如龍蛇形有頃長五六丈大四
圍所詘折委曲貫紫宮西在斗西北子亥間後詘如環
北方不合留一刻許占曰文昌為上將貴相時帝舅王
鳳為大將軍其後宣帝舅子王商為丞相皆貴重任政
鳳妬商譖罷商自殺親屬皆廢黜 四年正月癸卯隕

石藁四肥累一

皆縣名
屬真定

陽朔三年二月壬戌隕石白

馬八

東郡之
縣名

四年閏月庚午飛星大如缶出西南入

斗下占曰漢使匈奴明年單于死漢遣使往吊 鴻嘉

二年五月癸未隕石杜衍三

南陽之縣名

永始二年二月

癸未夜過中星隕如雨長一二丈繹繹未至地滅

師古曰繹

繹光采貌至鷄鳴止谷永對曰日月星辰燭臨下土其有石

隕之異則遐邇幽隱靡不咸睹星辰附離於天猶庶民

附離王者也王者失道綱紀廢頽下將叛去故星叛天

而隕以見其象春秋記異星隕最大自魯嚴以來至今

再見臣聞三代所以喪亡者皆繇婦人羣小湛湎於酒

湛讀曰沈又音耽下亦同

書云乃用婦人之言四方之逋逃多罪是

信是使

師古曰周書泰誓也言紂惑於妲已而昵近亡逃罪人信用之

詩曰赫赫宗周

褒如威之

師古曰小雅正月之詩也已解於上威許悅反

顛覆厥德荒沈于酒

師古曰大雅抑之詩也刺王傾敗其德荒廢政事而耽酒

及秦所以二世而亡者養

生太奢奉終太厚方今國家兼而有之社稷宗廟之大

憂也京房易傳曰君不任賢厥妖天雨星 元延元年

三月隕石都關一

山陽縣名

四月丁酉日鋪時天暝晏殷殷

如雷聲有流星頭大如缶長十餘丈皎然赤白色從日

東南去四面或大如盂或如鷄子耀耀如雨下至昏止
郡國皆言星隕春秋星隕如雨為王者失勢諸侯起伯
之異也其後王莽遂專國柄王氏之興萌於成帝時是
以有星隕之變後莽遂篡國 綏和元年正月辛未有
流星從東南入北斗長數十丈二刻所息占曰大臣有
繫者其年十一月庚子定陵侯淳于長坐執左道下獄
死

哀帝建平元年正月丁未隕石北地十其九月甲辰隕

石虞二

梁國縣名

平帝元始二年六月隕石鉅鹿二

自惠盡平隕石凡十一皆有光耀雷聲成哀尤屢見

光武建武十年三月癸卯流星如月從太微出入北斗

魁第六星色白旁有小星射者十餘枚滅則有聲如雷

食頃止

孟康曰流星光跡相連也絕跡而去為飛也

流星為貴使星大者使

大星小者使小太微天子廷北斗魁主殺星從太微出

抵北斗魁是天子大使將出有所伐殺

古今注曰正月壬戌月犯心後

星閏月庚辰火入輿鬼過軫
北庚申月在斗赤如丹者也

十二月己亥大流星如缶

出柳西南行入軫且滅時分為十餘如遺火狀須臾有
聲隱隱如雷柳為周軫為秦蜀大流星出柳入軫者是
大使從周入蜀是時光武帝使大司馬吳漢發南陽卒
三萬人乘船泝江而上擊蜀十二年十一月丁丑敗公
孫述兵殺述明日漢入屠蜀城誅述大將公孫晃延岑
等所殺數萬人夷滅述妻宗族萬餘人以上是大將出
伐殺之應也其小星射者及如遺火分為十餘皆小將

相隨之象有聲如雷隱隱者兵將怒之徵也 十二年

正月

古今注曰丁丑月犯軒轅大星

己未小星流百枚以上或西北或

正北或東北二夜止

古今注曰二月辛亥月入氐暈珥圓角亢房

六月戊寅

晨小流星百枚以上四面行小星者庶民之類流行者
移徙之象也或西北或東北或四面行皆小民流移之
徵是時西討公孫述北征盧芳匈奴助芳侵邊漢騎將
軍馬武騎都尉劉納閭興軍下曲陽臨平呼沱以備胡
匈奴入河東中國未安米穀荒貴民或流散後三年吳

漢馬武又徙鴈門代郡上谷關西縣吏民六萬餘口置
常關居庸關以東以避胡寇自是小民流移之應十月
丁卯大星流有光發東井西行聲隆隆郝萌占曰流星
出東井所之國水 中元二年十月戊子大流星從西
南東北行聲如雷流星為使中郎將竇固揚虛侯馬武
等將兵西征也

孝明永平元年四月丁酉流星大如斗起天市樓西南
行光照地流星為外兵西南行為西南夷是時益州發

丘擊姑復蠻夷大年替陵斬首詣洛陽 七年流星大

如杯從織女西行光照地織女天之貴女流星出之女
主憂其月癸卯光烈皇后崩

孝章建初元年二月甲寅流星過紫宮中長數丈散為
三滅為大人忌後四年明德皇后崩 六年七月丁酉
夜有流星起軒轅大如拳歷文昌餘氣正白向西如文
昌久久乃滅

孝和永元元年正月辛卯有流星起參長四丈

古今注曰大如

拳起參

有光色黃白

古今注曰癸亥鎮在參又有流星大如桃色赤起太微東蕃石氏曰

鎮守參有土功事

二月流星起天棓東北行三丈所滅色青白

壬申夜有流星起太微東蕃長三丈三月

古今注曰戊子土在參

丙辰流星起天津

古今注曰星大如桃起天津東至斗黃白頻有光

壬戌有流

星起天將軍東北行

古今注曰色黃無光

參為邊兵天棓為兵太

微天廷天津為水天將軍為兵流星起之皆為兵其六

月漢遣車騎將軍竇憲執金吾耿秉與度遼將軍鄧鴻

出朔方並進兵臨私渠北鞬海斬虜首萬餘級獲生口

牛馬羊百萬頭日逐王等八十一部降凡三十餘萬人
追單于至西海是歲七月又雨水漂人民是其應也

二年二月丁酉有流星大如桃起紫宮東蕃西北行五

丈稍滅

古今注曰三月甲子火在亢南
端門第一星南乙亥金在東井

四月丙辰有流

星大如瓜起文昌東北西南行至少微西滅有頃音如

雷聲已而金在軒轅大星東北二尺所

古今注曰丁丑
火在氐東南星

東八月丁未有流星如鷄子起太微西東南行四丈所

南消十月癸未有流星大如桃起天津西行六丈所消十

一月辛酉有流星大如拳起紫宮西行到胃消 三年

九月丁卯流星大如鷄子起紫宮西南至北斗柄間消

尾紫宮占曰有流星出紫宮天子使也色赤言兵色白言義色黃言蟲色青言憂色黑言水出皆以所之野命

東西南北紫宮天子宫文昌少微為貴臣天津為水北斗主

殺流星起歷紫宮文昌少微天津文昌為天子使出有

兵誅也竇憲為大將軍與其弟篤景女弟壻郭舉等坐

謀不軌伏誅 六年六月己丑流星大如桃起參北西

至參尾南稍有光 七年正月丁未有流星起天津入

紫宮中減色青黃有光 八年九月辛丑夜有流星大

如拳起婁 十一年五月丙午流星大如瓜起氐西南

行稍有光白色

古今注曰六月庚辰月入畢中

占曰流星白為有使客

大為大使小亦小使疾期疾遲亦遲大如爪為近小行

稍有光為遲也又正王日邊方有受王令者也明年二

月蜀郡旄牛徼外夷白狼樓薄種王唐繒等率種人口

十七萬歸義內屬賜金印紫綬錢帛 十四年十一月

丁丑有流星大如拳起斗魁中北至閣道稍有光色

赤黃湏臾西北有雷聲 十六年十月辛亥流星起鉤

陳北行三丈有光色黃 元興元年二月庚辰有流星

起角亢五丈所四月辛亥有流星起斗東北行到湏女

七月己巳有流星起天市五丈所光色赤閏月辛亥水

金俱在氐

巫咸曰辰星守氐多水災海中占曰天下大旱所在不收荊州星占太白守氐國君大哭

流星起斗東北行至湏女湏女燕地天市爲外軍水金

會爲兵誅其年遼東貊人反鈔六縣發上谷漁陽右北

平遼西烏桓討之

殤帝延平元年九月隕石陳留四傳曰隕星也董仲舒
以為從高反下之象或以為庶人惟星隕民困之象也
順帝永和三年二月辛丑有流星大如斗從西北東行
長八九尺色黃赤有聲隆隆如雷

桓帝延熹七年二月癸亥隕石右扶風一鄠又隕石二
皆有聲如雷

靈帝光和元年四月癸丑流星犯軒轅第二星東北行
入北斗魁中流星為貴使軒轅為內宮北斗主殺是天

子大使將出有伐殺也至中平元年黃巾賊起上遣中
郎將皇甫嵩等征之斬首十餘萬級 中平中夏流星
赤如火長三丈起河鼓入天市抵觸宦者星色白長三
丈後尾曲屈食頃乃滅狀似枉矢占曰枉矢流發其宮
射所謂矢當直而枉者操矢者邪枉人也六年大將軍
何進謀盡誅中官中官覺於省中殺進俱兩破滅天下
遂大壞亂

蜀後主建興十三年諸葛亮率大衆伐魏屯於渭南有

長星赤而芒角自東北西南流投亮營三投再還往大
還小占曰兩軍相當有大流星來走軍上及墜軍中者
皆破敗之徵也九月亮卒於軍焚營而退羣帥交怒多
相誅殘

魏明帝景初二年宣帝圍公孫文懿於襄平八月景寅
夜有大流星長數十丈白色有芒鬣從首山東北流墜
襄平城東南占曰圍城而有流星來走城上及墜城中
者破又曰星墜當其下有戰場又曰凡星所墜國易姓

九月文懿突圍走至星墜所被斬屠城坑其衆

元帝景元四年六月有大流星二並如斗見西方分流
南北光焰地隆隆有聲按占流星為貴使星大者使大
是年鍾鄧尅蜀二星蓋二帥之象二帥相背又分流南
北之應鍾會既叛三軍憤怒隆隆有聲兵將怒之徵也
晉武帝泰始四年七月星隕如雨皆西流占曰星隕為
百姓叛西流吳人歸晉之象也二年吳夏口督孫秀率
部曲二千餘人來降 太康九年八月壬子星隕如雨

劉向傳言下去其上之象後三年帝崩而惠帝立天下自此亂矣

惠帝泰安二年十一月辛巳有星晝隕中天北下光變白有聲如雷按占曰營首營首所在下有兵流血明年劉石攻略并州多所殘滅王浚起燕代引鮮卑攻掠鄴中百姓塗地有聲如雷怒之象也永興元年七月乙丑星隕有聲二年十月星又隕有聲占同上是後遂亡中夏

懷帝永嘉元年九月辛卯有大星如日自西南流於東北小者如斗相隨天盡赤聲如雷占曰流星為貴使星大者使大是年五月汲桑殺東燕王騰遂據河北十一月始遣和郁為征北將軍鎮鄴西田甄等大破汲桑斬於樂陵於是以甄為汲郡太守弟蘭鉅鹿太守小星相隨者小將副帥之象也司馬越忿魏郡以東平原以南皆黨於桑以賞田甄等於是侵掠桑地有聲如雷忿怒之象也十二月丁亥星流震散按劉向說天官列宿在

位之象其衆小星無名者衆庶之類此百官衆庶將流散之象也是後天下大亂百官萬姓流移轉死矣 四年十月庚子大星西北墜有聲尋而帝蒙塵於平陽元帝永昌元年七月甲午有流星大如甕長百餘丈青赤色從西方來尾分為百餘岐或散時王敷亂百姓流亡之應也

成帝咸康三年六月辛未流星大如二斗魁色青赤光耀地出奎中沒婁北按占為饑五穀不藏是月大旱饑

六年二月庚午朔有流星大如缶光耀地出天市西北入太微占曰大人當之八年六月成帝崩

穆帝永和八年六月辛巳日未入有流星大如三斗魁從辰已上東南行晷度推之在箕斗之間蓋燕分也按占為營首營首之下流血滂沱是時慕容儁僭稱大燕攻伐無已十年四月癸未流星大如斗色赤黃出織女沒造父有聲如雷占曰燕齊有兵百姓流亡其年十二月慕容儁遂據臨潼盡有幽并青冀之地緣河諸將

奔敗河津隔絕慕容恪攻齊

海西公太和四年十月壬申有大流星西下有聲如雷
明年遣使免袁真爲庶人桓溫征壽春真病死息瑾代
立求救於苻堅溫破苻堅軍六月壽春城陷

孝武太元六年十月乙卯有奔星東南經翼軫聲如雷
占曰楚地有兵軍破百姓流亡十二月苻堅荊州刺史
梁成襄陽太守閭震率衆伐竟陵桓石虔擊大破之生
擒震斬首七千獲生口萬人聲如雷將帥怒之象也

十三年閏月戊辰天狗東北下有聲占曰有大戰流血
自是後慕容垂翟遼姚萇苻登慕容永並阻兵爭強十
四年正月彭城妖賊又稱偽號於皇丘劉牢之破滅之
三月張道破合鄉太山向欽之擊破之

安帝隆安五年三月甲寅流星赤色衆多西行經牽牛
虛危天津閣道貫太微紫宮占曰星庶人類衆多西行
衆將西流之象經天子庭主弱臣強諸侯兵不制其年
五月孫恩侵吳郡殺內史六月至京口於是內外戒嚴

營陣屯守劉裕追破之元興元年七月大饑人相食浙江以東流亡十六七吳郡吳興戶口減半又流奔而西者萬計十月桓元遣將擊劉軌破走之軌奔青州

石勒末年星隕於鄴東北六十里初赤黑黃雲如幕長數十丈交錯如雷震聲墜地氣熱如火塵起連天時有畊者往視之土猶然沸見一石方尺餘青色而輕擊之聲如磬未幾石勒死虎殺其子而自立

宋文帝元嘉十年十二月有流星大如甕尾長二十餘

丈

梁武帝天監十年九月丙申天西北隆隆有聲赤氣下
至地占曰天狗也所往之鄉有流血其若失地其年十
二月馬仙琕大破魏軍斬馘十餘萬克復朐山城 中
大通四年七月甲辰星隕如雨占曰星隕陰失其位災
害之象萌也星隕如雨人民叛下有專討大人憂其後
侯景狡亂以憂崩人衆奔散皆其應也 太清三年有
流星長三十丈墮武軍

元帝承聖元年十二月星隕吳郡 三年十一月周人

圍江陵有流星墜城中

陳文帝天嘉六年三月丁卯日入後衆星未見有流星
白色大如斗從太微間南行尾長尺餘占曰有兵與喪
明年帝崩少帝廢

後魏道武帝登國四年三月丁未有大流星東南行尾
屬地六七丈有聲 九年有星墜於河北聲如雷震光
明燭天地

文成帝興安元年五月辛亥流星大如五斗許西南爲
六七段有聲

獻文帝大安元年十一月乙酉有流星照地啾啾有聲
孝靜帝武定四年九月丁未高祖圍玉壁城有星墜於
營衆驢皆鳴占曰破軍殺將高祖不豫次年崩

周武帝天和三年二月庚午有流星大如斗出在攝提
流至天津滅有聲如雷 建德六年十二月癸丑流星
大如月西流有聲蛇行屈曲光焰地占曰兵大起下有

戰場戊辰平旦有流星大如三斗器色赤出紫宮凝著
天乃北下占曰人主去其宮殿是月營州刺史高寶寧
反其明年帝總戎北伐後年帝崩

宣帝大成元年六月丁卯有流星大如鷄子出氐中西
北流有尾迹長一丈所入月中即滅占曰不出三年人
主憂又曰有亡國靜帝幽閉之應己丑有流星一大如
斗色青有光明照地出營室抵壁入濁二年四月乙
丑有星大如斗出天厨流入紫宮抵鉤陳乃滅占曰有

大喪兵大起將軍戮又曰臣犯上主有憂其五月帝崩
隋公執國政大喪臣犯主之應趙王越王以謀執政被
誅又荊豫襄三州諸蠻反尉遲廻王謙司馬消難各舉
兵畔不從執政終以敗亡此皆大兵起將軍戮之應也
五月甲辰有流星一大如三斗器出太微端門流入翼
色青白光明照地聲若風吹幡旗占曰有立王若徙王
又曰國失君其月巳酉帝崩劉昉矯制以隋公受遺詔
輔政終受天命立王徙王失君之應也七月壬子歲星

太白合於張有流星大如斗出五車東北流光明燭地
隋文帝開皇元年十一月己巳有流星聲如隕墻光燭
地占曰流星有光有聲名曰天保所隆國有喜其九年
平陳天下一統 五年八月戊申有流星數百四散而
下占曰小星四面流行者庶人流移之象其九年平陳
江南士人悉播遷京師 十九年十二月乙未星實於
渤海占曰王失其位災害之萌也又曰大人憂

煬帝大業十一年十二月戊寅大流星如斛隆賊盧明

月營破其衝輜壓殺十餘人占曰奔星所墜破軍殺將
其年王充擊盧明月城破之 十二年五月癸巳大流
星隕於吳郡為石占曰有亡國有死王有大戰破軍殺
將其後大軍破逆賊劉元進於吳郡八月壬子有大流
星如斗出王良閣道聲如隕墻癸丑大流星如甕出羽
林 十三年五月辛亥大流星如甕墜於江都占曰其
下有大兵戰流血破軍殺將明年帝遇弒

唐高祖武德三年十月己未有星隕於東都隱隱有聲

太宗貞觀二年天狗隕於夏州城中 十四年八月有
星隕於高昌城中 十六年六月甲辰西方有流星如
月西南行三丈乃滅占曰星甚大者為人主 十八年
五月流星出東壁有聲如雷占曰聲如雷者怒象 十九
年四月己酉有流星向北斗杓而滅

高宗永徽三年十月有流星貫北極 四年十月十日
睦州女子陳石真反婺州刺史崔義元討之有星隕於
賊營 乾封元年正月癸酉有星出太微東流有聲如

雷 咸亨元年十一月西方有流星聲如雷 調露元年十一月戊寅流星入北斗魁中乙巳流星燭地有光使星也

武后延載元年六月幽州都督孫佺討奚契丹出師之夕有大星隕於營中

中宗神龍三年三月丙辰有流星聲如頽墻光燭天地 景龍二年二月癸未有大星隕於西南聲如雷野雉皆雊 景雲元年八月己未有流星出五車至上台滅

九月甲申有流星出中台至相滅 太極元年正月辛卯有流星出太微至相滅

元宗開元二年五月乙卯晦有星西北流或如甕或如斗貫北極小者不可勝數天星盡搖至曙乃止占曰星民象流者失其所也漢書曰星搖者民勞 十二年十月壬辰流星大如桃色赤黃有光燭地占曰色赤爲將軍使 天寶三載閏二月辛亥有星如月墜於東南墜後有聲

肅宗至德二載賊將武令珣圍南陽四月甲辰夜中有
大星赤黃色其長數十丈光燭地隆賊營中十一月壬
戌有流星大如斗東北流長數丈蛇行屈曲有碎光迸
出占曰是謂枉矢

代宗廣德二年六月丁卯有妖星隕於汾州十二月丙
寅自乙夜至曙有星流如雨 大曆二年九月乙丑晝
有星如一斗器色黃有尾長六丈餘出南方沒於東北
東北於中國則幽州分也 三年九月乙亥有星大如

斗北流有光燭地占為貴使 六年九月甲辰有星西
流大如一斗器光燭地有尾迸光如珠長五丈出婺女
入天市南垣滅 八年六月戊辰有流星大如一升器
有尾長丈餘入太微十二月壬申有流星大如一升器
有尾長二丈餘出紫微入濁 十年三月戊戌有流星
出於西方如二升器有尾長二丈入濁 十二年二月
辛亥有流星如桃尾長十丈出匏瓜入太微

德宗建中四年八月庚申有星隕於京師 興元元年

六月戊午星或什或伍而隕 貞元三年閏五月戊寅
枉矢墜於虛危 十四年閏五月辛亥有星墜於東北
光燭如晝聲如雷

憲宗元和二年十二月己巳西北有流星亘天尾散如
珠占曰有貴使 四年八月丁丑西北有大星東南流
聲如雷鼓 六年三月戊戌日晡天陰寒有流星大如
一斛噐墜於兗鄆間聲震數百里野雉皆雊所墜之上
有赤氣如立蛇長丈餘至夕乃滅時占者以為日在戌

魯分也不及十年其野主殺而地分 九年正月有大
星如半席自下而升有光燭地羣小星隨之四月辛巳
有大流星尾迹長五丈餘光燭地至右攝提西滅 十
二年九月己亥甲夜有流星起中天首如甕尾如二百
斛舡長十餘丈聲如羣鴨飛明若火炬過月下西流湏
臾有聲礧礧墜地有大聲如壞屋者三在陳蔡間 十
四年五月己亥有大流星出北斗魁長二丈餘南抵軒
轅而滅占曰有赦赦視星之大小 十五年七月癸亥

有大星出鉤陳南流至婁滅

穆宗長慶元年正月丙辰有大星出狼星北色赤有尾
迹長三丈餘光燭地東北流至七星南滅四月有大星
墜於吳聲如飛羽七月乙巳有大流星出參西北色黃
有尾迹長六七丈光燭地至羽林乃滅八月辛巳東北
方有大星自雲中出色白光燭地前銳後大長二丈餘
西北流入雲中滅 二年四月辛亥有流星出天市光
燭地隱隱有聲至即位滅市者小人所聚郎在天廷中

主宿衛六月丁酉有小星隕於房心間閏十一月丙申
有流星大如斗抵中台上星 三年八月丁酉夜有大
流星如數斗器起西北經奎婁東南流去月甚近迸光
散落陸地有聲 四年四月紫微中星隕者衆七月乙
卯有大流星出天舡犯斗魁樞星而滅占曰有舟楫事
丙子有大流星出天將軍東北入濁

敬宗寶曆元年正月乙卯有流星出北斗樞星光燭地
入濁占曰有赦 二年五月癸巳西北有流星長三丈

餘光燭地入天市中滅占為有誅七月丙戌日初入東南有流星向南滅以晷度推之在箕斗間八月丙申有大流星出王良長四丈餘至北斗杓滅王良奉車御官也

文宗太和四年六月辛未自昏至戊夜流星或大或小觀者不能數占曰民失其所王者失道綱紀廢則然又曰星在野象物在朝象官 七年六月戊子自昏及曙四方流星大小縱橫百餘 八年六月辛巳夜中有流

星出河鼓赤色有尾迹光燭地迸如散珠北行近天棓
滅有聲如雷河鼓為將軍天棓者帝之武備 九年六
月丁酉自昏至丁酉夜流星二十餘縱橫出沒多近天漢
開成二年九月丁酉有星大如斗長五丈自室辟西
北流入大角下沒行類枉矢中天有聲小星數百隨之
十一月丁丑有大星隕於興元府署寢室之上光燭庭
宇 三年五月乙丑有大星出於柳張尾長五丈餘再
出再沒 四年二月乙亥丁夜至戊夜四方中天星流

大小凡二百餘並西流有尾迹長二丈至五丈八月辛未流星出羽林有尾迹長八丈餘有聲如雷羽林天軍也十二月壬申蚩尤旗見

武宗會昌元年六月戊辰自昏至戌夜小星數十縱橫流散占曰小星民象七月庚午北方有星光燭地東北流經王良有聲如雷十一月壬寅有大星東北流光燭地有聲如雷四年八月丙午有大星如炬火光燭天地自奎婁掃北方七宿而隕六年二月辛丑夜中有

流星赤色如桃光燭地有尾迹貫紫微入濁

懿宗咸通六年七月乙酉甲夜有大流星長數丈光燄如電羣小星隨之自南徂北其象南方有以衆叛而之北也 九年十一月丁酉有星出如匹練亘空化為雲而沒在楚分是謂長庚見則兵起 十三年春有二星從天際而上相從至中天狀如旌旗乃隕九月蚩尤旗見

僖宗乾符二年冬有二星一赤一白大如斗相隨東南

流燭地如月漸大光芒猛怒 三年晝有星如炬火大
如五升器出東北徐行隕於西北 四年七月有大流
星如盂自虛危厯天市入羽林滅占為外兵 中和元
年有異星出於輿鬼占者以為惡星八月己丑夜星隕
如雨或如杯如椀者交流如織庚寅夜亦如之至丁酉
止 三年十一月夜星隕於西北如雨 光啓二年九
月有大星隕於揚州府署延和閣前聲如雷炎光燭地
十月壬戌有星出於西方色白長一丈五尺屈曲而隕

占曰長庚也下則流血 三年五月秦宗權擁兵於汴
州北郊晝有大星隕於其營聲如雷是謂營頭其下破
軍殺將

昭宗乾寧元年夏有星隕於越州後有光長丈餘狀如
蛇或曰枉矢也 三年六月天暴雨雷電有星大如椀
起西南墜於東北色如鶴練聲如羣鴨飛占為姦謀

光化元年九月丙子有大星墜於北方 三年三月丙
午有星如二十斛舡色黃前銳後大西南行十一月中

天有大星自東緩流如帶屈曲光凝著天食頃乃滅是謂枉矢 天復三年二月帝至自鳳翔其明日有大星如月自東濁際西流有聲如雷尾迹橫貫中天三夕乃滅 天祐元年五月戊寅乙夜雨晦暝有星長二十丈出東方西南向首黑尾赤中白枉矢也一日長星 二年三月乙丑夜中有大星出中天如五斗器流至西北去十丈許而止上有星芒炎如火赤而黃長丈五許而蛇行小星皆動而東南其隕如雨少頃沒後有蒼白氣

如竹叢上衝天中色曹曹占曰亦枉矢也

梁太祖乾化元年十一月甲辰夜東方有流星如數升
器出畢宿口曳光三丈餘有聲如雷

後唐莊宗同光三年六月甲申衆星交流丙戌衆星交
流庚寅夜一鼓西南有流星約七十餘皆有尾迹西南
流其年七月皇太后崩辛卯衆小星流於西南九月丁
未天狗墮有聲如雷野雉皆雊

明宗天成元年六月乙未衆小星交流 二年三月庚

申衆小星流於西北 三年自正月至於六月宗人宗
正搖不止 長興元年九月辛酉衆小星交流而隕丙
戌夜二鼓初東北方有小流星入北斗魁滅至五鼓初
西北方次北有流星狀如半升器初小後大速流入奎
滅尾迹凝天屈曲似雲而散光明燭地又東北有流星
如大桃出下台星向西北速流至斗柄第三星旁滅五
鼓後至明中天及四方有小流星百餘流注交橫六月
庚午衆星交流七月乙亥朔衆星交流

閔帝應順元年二月丁酉衆星流於西北

末帝清泰元年九月辛丑夜五鼓初有大星如五斗器
西南流尾迹長數丈色赤移時盤屈如龍形蹙縮如二
鐻相鬪而散又一星稍小東流有尾迹凝成白氣食頃
方散

晉高祖天福三年三月壬申夜四鼓後東方有大流星
狀如三升器其色白尾迹長二尺餘屈曲流出河鼓星
東三尺東流丈餘滅

周世宗顯德元年正月庚寅有大星墜有聲如雷牛馬
皆逸京城以為曉鼓皆伐鼓應之三年正月癸亥五
鼓後有大星出南斗東北流丈餘滅

宋太祖建隆元年正月戊午有星出東北方如半升器
青赤色北行初小後大尾迹斷續光燭地九月癸亥有
星出昴大如缶十二月戊辰有星如半升器青赤色出
參旗西南慢行而沒蒼光燭地三年五月乙丑天狗
墮西南占曰其地有兵後王師討西蜀孟昶既降草寇

連年方定 四年二月丙午有星如桃色赤如弧矢東
南沒有光明 乾德二年二月乙丑有星如三升器黃
白色出太微五帝南速行至外厨沒其體散落光燭地
三年六月丁巳有星如桃色黃赤出北斗魁經太微
垣北過角西漸大行五尺餘沒尾迹凝天有光明十二
月丁巳有星出天河青白色南行至天倉沒初小後大
如半升器光燭地 四年正月乙未有星出社星青白
色速行尾迹三丈餘初小後大沒有光明四月甲寅有

星出天乳青赤色如升器東南行貫房沒光燭地閏八月巳丑有星出天船如升器青白色西北速行沒於文昌 五年七月戊子有星出大角如升器青白色北行沒明燭地 六年六月巳卯有星出河鼓如升器慢行明燭地 開寶三年九月庚午廣州民見衆星皆北流知星者言劉氏當舉國以歸中原明年廣南平 四年八月辛卯有星出織女西北行尾迹三丈餘沒久有聲 五年八月乙巳有星出王良西北行四丈有聲而散

占云有聲怒也主使出 七年九月甲午有星出室西
北行星體散落有聲明燭地

太宗太平興國二年三月丙午有大星出天棓光燭地
三年十月甲寅有星出天船赤黃色如二升器至天
棓星體散明燭地七月辛巳有星如稱權沒於婁八月
壬寅有星出紫微鉤陳東如盃大赤黃色向北速行近
北極沒占曰外國有使至是冬三佛齊吐蕃山後兩林
蠻來貢 雍熙元年十月丁酉有星出昴赤色東南蛇

行二丈餘沒占曰外國使至又為姦邪之象 二年正月壬戌有星出東井其大倍於金星至輿鬼沒占云四表來貢是歲占城邛部州蠻西南蕃來貢 四年六月庚戌酉初有星出西北色青白入濁當戌地有聲如雷占曰戌地兵飢流血是後李繼遷擾西鄙八月乙亥有星出天關東色赤黃尾貫月 端拱元年四月辛亥亥時有星出天津大如釀赤黃色蛇行有聲明燭地犯天津東北星占云枉矢見逆臣誅其年陳廷山謀叛磔於

市閏五月辛亥丑時有星出奎如半月北行而沒占云
有溝瀆事乙卯有星出紫微鉤陳西大如醜色青尾迹
短赤光照地北行而沒九月癸丑有星出西南如太白
有尾迹至中天旁出一小星行丈餘又出一小星相隨
至五車沒占主兵戰賊敗 二年四月辛亥戌時有星
出東南如升器色白墜於氏房間占云宰相出明年春
趙普留守西京壬申有星出漸臺大如盃色赤東南急
行掩左旗過河鼓沒 淳化元年九月辛巳有星出羽

林色青南行光奪月占曰禁兵出十一月壬午流星出
天關如半月南行歷東井郎位攝提至大角東北墜於
地光芒四照聲如隕墻占曰秦燕分兵疫水旱 二年
正月丙申有星出水府西大如杯色赤黃經參其分為
三星相從至天苑東沒光燭地七月癸酉有星出雲雨
側大如杯色青白緩行三尺餘沒占云為大風發屋折
木 三年三月巳酉未時西北方有星西北速行大如
杯色青白有尾迹占云有陰謀將不和刑傷兵疫之象

屬燕分四月己卯有星出文昌西南速行至柳分為二
星而沒六月己丑有星出天市垣屠肆東色青白西北
慢行丈餘分為三星從而沒 四年五月乙未平明有
星東南出南斗大如杯色青白西北行而沒占云衆星
沒流星出者為警動衆庶之象色青白主兵急流事速
五年八月己酉常星未見有星出東方色青白東北
慢行入濁沒約出奎婁間占為兵衆之象九月庚午有
星出昴北大如杯緩行過卷舌至礪石沒占云星大事

大緩行事緩為候兵討賊殺將之象 至道元年四月
乙巳常星未見有星出心北大如杯色青赤急行而墜
占云兵象七月癸丑有星出危大如杯色青白入羽林
沒占云為兵大起將軍出 二年五月辛丑有星出紫
微北尾迹丈餘彗而有聲墜於室壁間占云所墜之地
破軍殺將今墜北方主北蕃君長灾五月己未日未及
地五尺間有星出中天大如杯色赤黃有尾迹東北速
行二丈餘沒占云動衆之象荆楚有兵疫六月己卯有

星出牽牛西厯狗國光芒丈餘墜東南及地無聲又有
星出翼貫天廟墜於稷星東光燭地占云邊庭不靖又
云兵起命將宜告廟九月丁酉平明有星出北方大如
杯東行三丈餘分為三星從而沒占云皇王欲發使慰
四方 三年九月丁丑有星二隕於西南一出南斗一
出牽牛有光三丈許

真宗咸平五年三月丙午有星晝出心至南斗沒赤光
丈餘八月辛巳有星出營室大如杯色白有光九月丙

申有星出東方西南行大如斗有聲若牛吼小星數十
隨之而隕戍戌又有星十數入輿鬼至中台凡一大星
偕小星數十隨之其間兩星如升器大一至狼星一至南
斗沒占曰燕朔民流徙又曰有兵不戰踰年契丹擾河
朔請盟而去壬子有星出中天如缶尾迹數道如迸火
西流至狼弧沒 六年五月乙未有星出王良西又出
北極稍東北至垣外沒有聲如雷占曰遠邦有歸伏者
其年高麗三佛齊大食蒲端國並朝貢七月壬辰有星

出昴尾迹丈餘色白隱隱有聲至狼沒占曰有赦明年
改元大赦二月乙酉威虜軍有星大如斗厯城西北尾
迹長數里光焰地落蕃帳有聲如雷者三占曰有敗兵
流血殺將伏尸明年春李繼遷寇西涼府為潘羅支所
敗中流矢死景德元年十月戊申天雄軍有星出北
方大如斗隕於西北赤光丈餘二年正月丙子日未
沒有星速流西南大如杯占曰外國大使至是冬契丹
使來四月癸卯有星北流入天市如升噐尾迹丈餘十

二月壬子有星出胃南聲如雷光燭地 三年五月乙卯有星出天津東北至紫微垣北分為四星隨而沒赤黃有尾迹丁酉有星出胃北入天囷迸為數星光燭地七月庚申有星出虛旁有短彗聲如雷至東北沒赤光照地占曰秦楚有暴兵明年宜賊叛荆楚發兵十一月辛丑有星出中台東北速流有聲光燭地 四年六月丙辰有星出北方慢流至八穀迸為數星沒光燭地七月辛卯有星出敗瓜南大如杯慢流歷河鼓入天市至

宗人東北迸為二星沒色赤黃有尾迹十二月癸巳有
星出弧矢赤黃色尾迹丈餘光燭地速流入濁占曰燕
趙饑 大中祥符元年二月戊申有星十餘急流入濁
色赤黃有尾迹五月辛未有星如太白出天市垣宗人
東南尾迹丈餘闊三寸向北慢流至女牀西分為數星
沒九月乙丑有星出天倉急流東南星體散落 二年
三月己未有星如斗器出天津南至離珠沒尾迹五尺
餘照地明占曰后宮憂四月丙申有星出八穀如升器

有尾迹速流西至五車東迸為數星沒八月丙申有星
出北斗杓西南急行至郎將西分為數段占曰燕分飢
三年三月丁未有星出天市宗人東北如升器尾迹
二丈至旗迸為數星沒光燭地五月丁亥有星出北斗
魁如桃色青白尾迹二丈餘乙丑有星出傳舍如桃色
赤黃至紫微沒壬申有星出建星如升器入南斗沒赤
黃有尾迹七月庚辰有星出宗人西如升器北流入濁
光照地八月丁未有星出貫索如升器至帝席沒尾迹

光明九月庚辰有星出軒轅如半升器入太微垣沒十月甲戌有星出東方赤黃無尾迹分為數星稍南沒

四年二月辛亥有星出東方尾迹赤黃二丈餘占為天保星所見吉四月乙丑有星出柳如升器色赤黃至翼沒六月壬戌有星出觜東北如升器流入濁占曰東北蠻夷憂七月壬申有星出紫微宮如升器速流至天皇沒十月戊午有星出東北如升器流入濁又星出七星南大如杯至天稷沒尾迹丈餘 五年二月戊申有星

出貫索經庫樓迸為數星沒八月戊午有星大小二十餘皆有尾迹北流又一星如升器光燭地出紫微垣外尾丈餘闊三寸許東北流至傳舍沒占有大慶大赦是冬聖祖降赦常所不原者 六年十一月丁巳有星出太微郎位東大如杯色赤黃有尾迹至軫北迸為數星沒占曰大臣憂 七年三月丙戌有星出南河大如杯至玉井沒占曰秦齊飢四月辛酉有星出鉤陳大如杯尾迹赤黃占曰發大使宣急令是歲遣巡撫江淮兩浙

八年二月丁卯有星出郎將北迸為三星四月癸丑
有星出亢西至右攝提迸為數星隨而沒五月乙酉有
星大如杯青白色出人星至騰蛇沒光燭地八月己亥
有星出參大如杯南流入濁 天禧元年四月己巳有
星出軫大如杯至器府北沒光焰地十二月癸巳有星
出東北大如杯尾迹赤黃急流西南沒 二年八月乙
卯有星二大如杯尾迹赤黃一出五車一出狼北入濁
九月戊子有星如二升器出西南河色赤黃至柳沒

三年六月乙巳星出昴大如杯急流至天倉沒十二月
壬寅有星出軒轅大如杯尾迹黃慢流至太微垣久之
有聲如雷占曰女主之慶 四年正月丁巳有星出王
良大如杯明照地至騰蛇沒占曰有大水其年秋京師
大雨河渠壅溢壞廬舍 五年四月己未有星出南方
如二升器北流入濁尾迹三丈餘十月乙巳有星出天
津西大如杯

文獻通考卷二百九十一